

В СРЕДУ 4-Я СЕДМИЦЫ ВЕЧЕРА.

На Господи воззвах, поставим стихов 10:

И поем настоящия самогласны, и мученичен, и в Минеи 4.

Самогласен. Глас 4:

Пост благих ходатай, * свое преполовение ныне введе, * прешедшими деньми благоугодив, * и прочими пользование предложив: * ибо благих напряжение, множайшее благодеяние творит. * Темже всех благих дателю Христу благоугождающе, вопием: * постивыйся нас ради, * и распятие претерпевый, неосуждены нас сподоби, * причаститися и Божественныя Пасхи Твоя, * в мире пожившия, * и достойно со Отцем Тебе и Духом славящия.

Ин. Глас 5:

В тайне добродетели делающии, * духовная воздаяния чающии, * не посреде торжищ и распутий являют сия, * но внутрь сердца носят паче: * и всех видяй бываемая в тайне, * мзду воздержания подает нам. * Пост совершаем, не сетующе лица, но в клетех душ наших молящися, * непрестанно возопием: * Отче наш, Иже еси на Небесех, * не введи нас во искушение, молимся, * но избави нас от лукаваго.

Мученичен: Несытною любовию души, * Христа не отвергостеся святии мученицы, * иже различныя раны страстей претерпевше, * мучителей дерзость низложисте, * непреклонну и невредиму веру сохранише, * на небеса преставистеся. * Темже и дерзновение получивше к Нему, * просите даровати мир миру, * и душам нашим велию милость.

Ины стихиры, глас 1.

Подобен: Прехвальнии мученицы:

Поста водою, души вси омыим, * и приступивше к честному и животворящему Кресту Господню, * верою поклонимся, * Божественное просвещение почерпающе, * и вечное спасение ныне приобретающе, * мир и велию милость.

Апостолов похвало Кресте, * егоже окружают начала, силы, архангели, покланяющися тебе * от всякаго вреда спасай, * и божественное поприще воздержания нас сподоби добре * совершающия, день спасительный достигнути, * имже и спасаемся.

Ин подобен, глас 7:

Подобен: Днесь бдит:

Днесь Кресту Господню покланяющися возопием: * радуйся Древо жизни, ада разорителю. * Радуйся радости мира, и тления потребителю. * Радуйся, бесы прогоняй силою твоею, верных утверждение, * оружие нерушимое, * облобызающия тя соблюди, освяти, молимся.

И Минеи 4. Слава, и ныне, самогласен, глас 8:

Днесь неприкосновенный существом, * прикосновен мне бывает, * и страдает страсти, свободядай мя от страстей, * свет подаваяй слепым, от беззаконных устен оплевается, * и дает плещи за плененныя на раны. * Сего Чистая Дева и Мати на

Кресте зрящи, болезненно вещаше: * увы Мне Чадо Мое, * что сие сотворил еси? * Красный добротою паче всех человек, * бездыханный, беззрачный являешися, * не имея вида, ниже доброты: * увы Мне Мой свете, не могу спяща зрети Тя, * утробною уязвляюся, * и лютое оружие сердце Мое проходит. * Воспеваю Твоя страсти, покланяюся благоутробию Твоему: * долготерпеливе слава Тебе.

Вход. Свете тихий:

Прокимен, псалом 71, глас 4: Благословен Господь Бог Израилев, творяй чудеса един.

Стих: Боже, суд Твой царице даждь, и правду Твою сыну царице.

Бытия чтение. [Глава 9, ст. 18 – 24, глава 10, ст. 1.]

Быша сынове Ноевы изшедшии из ковчега, Сим, Хам, Иафет: Хам же бяше отец Ханаань. Трие сии суть сынове Ноевы, от сих разсеяшася по всей земли. И начат Ное человек делатель [быти] земли, и насади виноград: И испи от вина, и упися, и обнажися в дому своем. И виде Хам отец Ханаань, наготу отца своего, и изшед вон поведа обема братома своим. И взявше Сим и Иафет ризу, возложиша [ю] на обе раме свои, и идоша вспять зряще, и покрывша наготу отца своего, и лице их вспять зря, и наготы отца своего не видеша. Истрезвися же Ное от вина, и разуме елика сотвори ему сын его юнейший. И рече: проклят [буди] Ханаан отрок: раб будет братиям своим. И рече: благословен Господь Бог Симов: и будет Ханаан отрок раб ему. Да распространит Бог Иафета, и да вселится в селениях Симовых, и да будет Ханаан раб ему. Поживе же Ное по потопе лет триста пятьдесят: И быша вси дние Ноевы, лет девять сот пятьдесят, и умре. Сия же [суть] бытия сынов Ноевых, Сима, Хама, Иафета: и родишася им сынове по потопе.

Прокимен, псалом 72, глас 4: Мне же прилепятися Богови благо есть.

Стих: Коль благ Бог Израилев:

Притчей чтение. [Глава 12, ст. 23 – 28, глава 13, ст. 1 – 9.]

Муж разумивый престол чувствия: сердце же безумных срящет клятвы. Рука избранных одержит удобь: льстивии же будут в пленении. Страшное слово сердце мужа праведна смущает: весть же благая веселит его. Разумив праведник себе друг будет: мысли же нечестивых некротки: согрешающих постигнут злая: путь же нечестивых прельстит я. Не улучит льстивый ловитвы: стяжание же честное муж чистый. В путех правды живот: путие же злопомнящих в смерть. Сын благоразумный послушав отцу: сын же непокорливый в погибель. От плодов правды снесть благий: души же незаконных погибают безвременно. Иже хранит своя уста, соблюдает свою душу: продерживый же устнама, устрашит себе. В похотех есть всяк праздный: руки же мужественных в прилежании. Словесе неправедна ненавидит праведник: нечестивый же стыдится, и не возымеет дерзновения. Правда хранит незлобивья: нечестивыя же злы творит грех. Суть богатяще себе, ничесоже имуще: и суть смиряющесе во мнозе богатстве. Избавление мужа души свое ему богатство: нищий же не терпит прещения. Свет праведным всегда: свет же нечестивых угасает, души льстивыя заблуждают во гресех: праведнии же щедрят и милуют.

И прочее последование Преждеосвященных.

От сего же дне начинает священник, [или диакон, аще есть] двосугубая елика оглашения просвещаемых и молитву. Глаголются же даже до Среды Великия, кроме суббот и Недель.

В ЧЕТВЕРТОК 4-Я СЕДМИЦЫ

НА УТРЕНИ

ТРОИЧНЫ СЛУЧИВШАГОСЯ ГЛАСА.

По 1-м стихословии глаголем седальны апостольския Осмогласника.

По 2-м же стихословии глаголем настоящий седален,

господина Иосифа, глас 1.

Подобен: Лик ангельский:

Силою Креста утверждаеми, * всю леть вражию воистинну разористе апостоли славнии, * молитвенницы душ наших. * Темже днесь в поклонение его радуется, * о нас моляще единого Человеколюбца. [Дважды.]

Богородичен: Марие, честное Владыки приятелище, * возстави ны падшия в пропасть лютаго отчаяния, * и прегрешений, и скорбей: * Ты бо еси грешных спасение и помощь, * и державное предстательство, и спасаеши рабы Твоя.

По 3-м стихословии седален, господина Феодора, глас 7.

Подобен: Господи, мы есмы:

Господи, Твой Крест зряще предлежащий днесь, приступаем верно, в пениих и песнех, облобызающе его в страхе и радости: освяти рабы Твоя, умири мир Твой, сего явлением, едине Многомилостиве. [Дважды.]

Богородичен. Подобен:

Господи, мы есмы людие Твои, * и овцы пажити Твоея, * заблуждшия тлением, обрати нас: * расточенныя яко Пастырь собери нас, * помилуй стадо Твое Человеколюбче, * умилосердися молитвами Богородицы, * едине безгрешне.

Канон Минеи, и настоящий трипеснец господина Иосифа. И стихословится песнь. Глас 1.

Песнь 4.

Ирмос: На Божественней стражи * богоглаголивый Аввакум * да станет с нами * и покажет светоносна Ангела, * ясно глаголюща: * днесь спасение миру, * яко воскресе Христос, * яко Всесилен.

Освящения подательную благодать даруя нам святыи Кресте, апостолом утверждение и похвало, предлежиши в поклонение днесь всей вселенней, постное время облегчая нам.

Сеннописав Крест Моисей, распростер руке, Амалика победи, егоже воображающе, руке простираем, постом и мольбами, яко да полки победим бесовския, борющия нас всегда завистно.

Божественным ралом Креста изорасте землю, божественнии ученицы, плодоносну сию показавше, прозябающую благочестие. Темже вас гласы молитвенными восхваляюще, Христа присно славим.

Богородичен: Мати Бога благаго, ублажи мою душу, юже лукавый обычаем злым озлоби окаянно, прельстив мя: да яко вину спасения, песнословлю Тя присно Многопетую.

Ин. Глас 7.

Ирмос: Плотское * пришествие Твое Христе * уверяя пророк Аввакум, зываше: * слава силе Твоей Господи.

Предлагается днесь всесвятый Крест, приступим, целуим его: ибо есть рог спасения нашего.

Благодать твоя и образование твоим приходит, прогоняющи бесовское множество, Кресте Христов, оружие необоримое.

Троицен: Единицу Тя по Естеству воспеваю, Троицу же Ипостасьми чту, Отче, Сыне, и Душе Пресвятый.

Богородичен: Родила еси Отроковице безмужная Бога Всенепорочная, содержащаго горстию концы, и всех древнейшаго.

Слава Тебе Боже наш, слава Тебе.

Апостоли, мира молитвенницы, молитесь спастися и нам, содержащим оружие, Крест Христов.

Катавасия: Плотское * пришествие Твое Христе * уверяя пророк Аввакум, зываше: * слава силе Твоей Господи.

Песнь 8.

Ирмос: Сей нареченный и святой день, * Един суббот Царь и Господь, * праздников праздник * и торжество есть торжеств: * вонъже благословим Христа во веки.

Радуйся Кресте тричастный и божественный, на немже един от Троицы, плоть носив водрузися, водруженныя ны во глубину нечестия избавлей, превозносяция Его во веки.

Силу державную Крест стяжавше, лютою властью лукаваго поработившиися свободиша Слова ученицы, воспевающе: Тя превозносим во веки.

Увы мне, что страшный престол оный, на немже Слово сед, содеянная мною тайная явиши Христе, обличаяй нечувствие мое? Но естеством сый милостив, пощади мя тогда.

Богородичен: Недр не отступль Отеческих, в недрах возлег еси Девы, на призвание рода человеческого, егоже подобие, за милосердие Иисусе носил еси. Темже Тя поем человецы во веки.

Иный.

Ирмос: Единого * безначальнаго Царя славы, * Егоже благословят небесныя силы, * и трепещут чини ангельстии, * пойте священницы, * людие превозносите Его во веки.

Крестоносную твою седмицу почитаем, яко поклонительную, тебе бо Древо честное, покланяющесе вопием: пойте священницы, людие превозносите во вся веки.

Оле чудесе! Царю веков, яко Древо, на немже распялся еси, сподобил ны еси Твоя рабы видети, и поклонитися. Темже Тя со страхом поем во веки.

Благословим Отца, и Сына, и Святаго Духа, Господа.

Троицен: О единосущная, о Троице Всесвятая, Отче, Сыне, и Пресвятый

Душе, Божество: нераздельную Твою державу славлю, и пою едино Царство во вся веки.

Богородичен: Создавшего Адама по образу, и от смешения его происшедшего, и разрушившего древнюю клятву, пойте священницы, людие превозносите во вся веки.

Слава Тебе Боже наш, слава Тебе.

Двоенадесятиструнная цевнице церковная, яко поющая премудрости слово, апостоли вас воспевающия, просите видети страсть Господню, и пети во веки.

Хвалим, благословим, покланяемся Господни, поюще и превозносяще во вся веки.

Катавасия: Единого * безначального Царя славы, * Егоже благословят небесныя силы, * и трепещут чини ангельстии, * пойте священницы, * людие превозносите Его во веки.

Песнь 9.

Ирмос: Светися, светися, новый Иерусалиме: * слава бо Господня на тебе возсия, * ликуй ныне * и веселися, Сионе. * Ты же, Чистая, красуйся, Богородице, * о востании Рождества Твоего.

Уяснися, светися Церковь Божия, крестными зарями, егоже носиши предлежаща всем верным в поклонение: ты же множество все демонское, тьмы исполншееся, избегни.

Крепость воздержания, божественный есть Крест, содейственник бдящих, постников укрепление, борющихся поборник: сему вернии любовию приступивше, радостно поклонимся.

Основания божественная Церкви Христовы, утверждением благочестия вся соблюдайте, и на камени утвердите твердем, избравшаго вас апостоли славнии.

Богородичен: Радость приемшая архангеловым гласом, моего ныне сердца печаль потреби душетленную, и подаждь Чистая радостотворный плачь, яко да обрящу тамо Божественное утешение.

Иный.

Ирмос: Тя Пречистую * Матерь и Деву, * невместимое Слово * во утробу вместившую, * и родившую плотию, * песньми величаем.

Ты воображаемый, Меррския струи древле услаждаеши всечестное Древо: ты мое услади воздержание, Кресте Христов, днесь покланяемый.

Тя неборимое царствия оружие, воинства крепость, сикклита утверждение, Кресте Христов, вси песньми величаем.

Троицен: Тя безначального Отца и Владыку, и собезначального Слова, и Духа Святаго, благочестно вернии вси величаем.

Богородичен: Тя славную, и едину Богородицу, невместимое Слово во чреве вместившую и родившую плотию, песньми величаем.

Слава Тебе Боже наш, слава Тебе.

Тебе огненный звук апостола, яко поपालившия всякую вещь прелести, и благочестие насадившия в мире, песньми величаем.

Катавасия: Тя Пречистую * Матерь и Деву, * невместимое Слово * во утробу вместившую, * и родившую плотию, * песнями величаем.

Светилен гласа.

На стиховне самогласен, дважды. Глас 7:

Поревнуим вернии мытареву покаянию, * а не фарисейски похвалимся: * но из глубины сердца, стенание принесем Благодетелю всех Богу. * Той бо заповеда глаголя: * яко всяк возносяй себе смирится, * смиряяй же себе вознесется. * Темже единомудренно возопиим Ему: * Боже очисти нас грешных, и спаси нас.

Стих: Исполнихомся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Поревнуим вернии мытареву покаянию, * а не фарисейски похвалимся: * но из глубины сердца, стенание принесем Благодетелю всех Богу. * Той бо заповеда глаголя: * яко всяк возносяй себе смирится, * смиряяй же себе вознесется. * Темже единомудренно возопиим Ему: * Боже очисти нас грешных, и спаси нас.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Едино дышуще, на едино взирающе, * страстотерпцы мученицы, * един путь живота обретше, * за Христа смерть, ревностию воображающе кончину друг другу. * О чудесе! якоже сокровища муки предвосхищающе, * друг ко другу глаголаху: * яко аще и не ныне умрем, * умрем же всяко, * и бытию должная послужим. * Сотворим нужду любочестия, общее свое мняще, * смертию живот купим. * Молитвами их Боже помилуй нас.

Слава, и ныне, Богородичен:

Умири молитвами Богородицы, * живот нас вопиющих Ти Милостиве: * Господи слава Тебе.

НА 6-М ЧАСЕ

Тропарь Пророчества, Глас 6:

Кресту Твоему поклоняемся Владыко, * и святое Воскресение Твое славим.

Прокимен, псалом 73, глас 4: Бог же Царь наш прежде века, содела спасение посреде земли.

Стих: Вскую Боже отринул еси до конца?

Пророчества Исаиина чтение. [Глава 28, ст. 14 – 22.]

Тако глаголет Господь: услышите слово Господне мужие озлоблении, и князи людей сущих во Иерусалиме. Яко рекосте, сотворихом завет со адом, и с смертию сложение: буря носима аще мимоидет, не приидет на нас: положихом лжу надежду нашу, и лжею покроемся. Сего ради тако глаголет Господь: се Аз полагаю во основание Сиону камень многоценен, избран, краеуголен, честен, во основание ему, и веруй вонь не постыдится. И положу суд в надежду, милость же Моя на мерилех, и уповавшии вотще на лжу: яко не минет вас буря, И не отымет от вас завета смертнаго, и надежда ваша, яже ко аду, не пребудет. буря идущая аще найдет, будете ей в поправление. Егда мимоидет, возмет вас: яко по всяко утро преходити будет в день, в нощи будет надежда зла: научитесь слышати утесняемии: Не можем ратовати, сами же изнемогаем, еже обратися нам. Якоже гора на нечестивых востанет Господь, и будет [якоже] в дебри Гаваонстей, с яростию сотворит дела Своя, горести дело: ярость же Его чуждо употребится, и погубление Его странно. И вы не радуйтесь, ниже да возмогут ваши узы: зане скончаны и сокращены вещи слышах от Господа Саваофа, яже сотворит над всею землею.

Прокимен, псалом 74, глас 4: Аз же возрадуюся в век, воспою Богу Иаковлю.

Стих: Исповемься Тебе Боже, исповемься Тебе.